



Орган Лемковского Союза.

Выходит в каждый четверг.

Редакция и администрация в Крыници. — Адрес „Лемко“ Крыница.

Пренумерата в краю:
50 грошей місячно,
2.50 зл. полрочно,
5 зл. рочно.

В Америці: 1 дол. полрочно,
2 дол. рочно.

В Чехословакии:
3 кор. місячно, 15 кор. полрочно,
30 кр. рочно.

Конто чекове Нр. 404.155.

Амнести́я для бывших узников Брестя.

Министерство Правосудия зажадало от судов апелляционного и окружного в Варшаві актов в ділі бывших узников Брестя, засуженных на кару вязницы и утрату прав. По информациям, походячим из серьезных жерел, суд варшавский окружный и апелляционный выповіли ся за поставленем внесеня о помилованю бывших узников.

Оголошене о помилованю має наступити в найблизших днях и мало быти подписане уж дня 29 вересня через министра правосудия г на Михаловского. Амнести́я тотя не относит ся до Витоса, Керника, Багинского, Прагера и Либермана, бо они выхали за границу, она обнимат лем тех, котры остали в краю, а именно Барлицкого, Мастена, Цьолкоша и Дюбоа. Тот послідний сидит в тюрьмі мокотовской, а други находят ся на урляпах. Амнести́я даруе им кару без наданя прав.

Арестоване 42 людей в Варшаві.

Дня 26. вересня передано ревизии и найдено головный склад кольпортажа недозволеного писма: „Нові Штафета“ яке тайком выдае розвязана партия народоных радикалов. Сконфисковано 8000 экземплярей той газеты и арестовано 42 людей. Дальши ревизии и арестованя переводят у тех, котрых назвиска найдено в списі, находячом ся в редакции газеты. Сут то члены той части народоно-радикальной партии, котра тепер называт себе партией народоно-революционной.

КРЫНИЦА-ЗДРОЙ:

Пенсионаты ви́лла „Карпатска“ и Злота Брѣма“ положены в центрум, коло дептака. Текуча зимна и тепла вода. Веранды. Добра кухня, на требованс дистетична. Ціны низкы.

Советы продают Восточно-Китайскую железную дорогу.

За 10 миллионов фунтов стерлингов.

Из кругов официальных доносят, што Советы згодили ся уж продати Манджурии железную дорогу Восточно-Китайскую за 10 миллионов фунтов стерлингов (170 миллионов ен). В той сумі находит ся 30 миллионов ен, переназначеных на отпращу жел. дор. урядников советских, котры маот освободити тоту дорогу до шестох місяцов от дня подписаня договора.

Коли буде подписаный француско-советский договор?

С геневских кругов доносят, што Франция и Советы стремят до заключения договора в полном объеме союза довоенного, Союз такой має быти заключеный в формі пакта взаимной помочи. Француске правительство выразило желане, штобы союзный договор был заключеный ище до окончаня сесии Лиги Народов и был подписаный в Женеві.

Дакотры корреспонденты парьских газет подают, што Барту и Литвинов заключили уж такой договор и обовязали ся поддержати себе взаимно на случай нападеня на кого нибудь с них через Німеччину. Кроме того оба политыкы не забывают и восточного пакта и сподівають ся, же Польша до того пакта приступит.

Окончане штрайка в Америці.

Штрайк работников ткацких в Америці кончил ся. Работники достали приказ вступити до работы до фабрык, а спроваджены отділы народоной гвардии, котры в часі штрайку спроваджено для удержаня порядка, отпращено тепер на свои місца. Главар штрайкуючих доносит, же работники доби́ли ся вшиткого, што хотіли, а представитель фаб-

рыкантов подае, што ціла их побіда ест в том, же работникам признаю трохнедельны платны урляпы.

В Испании арестуют коммунистов и социалистов.

Президент Испании Заморра подписал декрет, объявляющий военное положение на землях цілой державы. На основаню того положеня испанске правительство достало неограниченны полномочия.

В цілой Испании переводят ревизии и арестованя коммунистов и социалистов. Заборонено всякы собраня и группованя на улицах понад 5 людей. Испанскы фашисты достали от военных властей револьверы, кульометы и други военны материялы.

Усилене власти во Франции.

Думерг выступил с предложением, штобы усилити власть во Франции. По его предложению, право роспустити сойм буде мати премьер за згодом президента без відома и згоды сената. Сесии сойма будут скорочены и увеличены будут права председателя. Таксамо маот быти уменьшены права профессионально-союзны урядников и служащих державных. Таким способом хоче Думерг запобічи частым змінам правительства и дати премьерови сильную власть.

Английска пожичка для Польши

на ціли промыслово-инвестиційны.

В звязи с переговорами господарчима, веденыма медже Польшом и Англиом, в кругах финансовых польских надіють ся одержати в близком часі пожичкы на ціли промыслово-инвестиційны. Переговоры в том ділі вѣдут ся уж от долгого часу.

Добра вода, то наше Здравє.

**Што канда газдыня мусит
знати о воді.**

Часто слышме остереженє, што той воды не треба уживати до питя, бо не добра, а зас в другом случаю бесідуют, же вода нездатна до прамя, бо тверда, але за то ест она смачна и чиста, инши ище гатунки воды н. п. ео ставу, або с річки еут добры до подливаня цвітов и ярин. И на правду воду береме с ріжних місц и уживаме ю до ріжних цілей. Має воду дощову, річну, студенну, часом со ставу и ям.

Уж зараз, як лем шмариме еком, видиме ріжницю медже тыма водами, вода студенна выдає ся нам чиста при воді со ставу, або ямы. Коли посмотреме на каплі воды через увеличаюче шкля, втотчає увидиме, же в тых малых капельках містит ся множество маленьких существ, котрых не видиме голым оком. Маюť они ріжний вид, одны сут делгы и проты, другы округлы, як кулькы або кропки, то зас протинкы, екручены пружинкы и инши, а вшиткы оживлены и в полном движеню. При дослідах замічаєме, што вода студенна має тых маленьких существ найменше, а вода дощова меньше от воды ставовой.

Але в воді кромі тых существ еут также ріжны екладники. Знаєме о том, же в воді можна роспустити цукер, соль, клей, желятыну и инши. Вода, плавучи под землем роспуцат также в собі вапно, сирку, соль и желе и маме тыж в зависимости от количества тых складников воды желісты (щавы), сирчаны, вапенны, и солянкы. Таки воды маюť свойства лічебны и называюť ся воды минеральны. Кромі вод минеральных маме воду жерельну, котра не має сильного якогоси смаку, але ест он чиста и смачна. Така вода ест на правду найчистіша и найздоровша. Добра до питя ест также вода с глубоких студень оцымброваных. Така вода ест здорова, бо она має барз мало маленьких существ, котры выкликуюť в наших организмах хвороты и тому ліпше задати собі больше труда и ити дальше по воду до питя, як пити воду нечисту.

Воды с рікы, ставов и дощовой не належит уживати николи до питя, хецбы така вода выдавала ся нам и найчистіша, бо вода така ест все занечищена и так вода дощова ест занечищена порохом забараным с повітря, дахов и жолобков, а инши через водоросты, землю, купаючих ся людей и мытый инвентар живий.

Воду нелевну што до чистоты треба конечно переварити и по остуженю пити. Можна также уживати воды фильтрованной, т. зн. перепущеной через ліжок, в котром находит ся вата, або бибула. Вода вапенна, при великом количестві вапна творит осадна дні посуду. Штобы осадну не было, треба таку переварену воду отставити, а коли она устоит, зляти сторожно без осадну.

До прамя уживаме воды річної, або дощовой, бо така вода ест „мягка“. Она не має в собі роспуценых минеральных солей, ани вапна. Тверду воду можеме змягчити через доданє соды, або отвару с деревяного попелу.

Вода до вареня має быти чиста, але мягка, бо в твердой воді ярины и овочи варят ся долго. Газдыні уживаюť часом очищеной соды, але не ест то добре, бо ярины, варены в воді со содом тратят смак. До страв и до питя мусиме отже старати ся о чисту и добру воду, бо она не лем для людей, але и для

инвентара живого ест жерелом здравя.

За то купати и мыти ся можеме в каждой воді, бодай лем она была чиста. Розуміє ся же найприятнійше ест купати ся в ріней, текучой воді, бо она ест все чистіша, от стоячей и має часте, пісковате дно. Але до мытя рук, лица и тіла вода мягка ест отвітнійша, бо в мягкой воді, особенно теплой сходит ліпше бруд и при том выходит меньше мыла. Мыло в воді твердой, вапенной трудно ся стерат и пінит ся аж по долшом часі.

Вода вапенна на загал ест здорова, а для многих организмов аж и потребна. В дакотрых случаях недиспозиций жолудковых купує ся в аптыці нарочно приготовлену (розуміє ся о великой вмістимости вапна) воду вапенну: пют ю стары и молоды при розстрою жолудка, а в случаях опареня уживаюť ю змішану с льняным оліюм на оклады.

Добра, чиста, сурова вода, уживана до питя не надмірно, помагат организмови травити, отсвіжат и дієвує користо на загальний стан здравя человека.

Лемковщина.

Добре бы нам было
На Лемках ту жити,
Лем ся гев нам не хце
Пшеничка родити.

Покус сой радиме,
Смеречкы стинаме.
Во инакшой рады,
Реку, уж не маме.

На одеджу треба
Баранкы ховати,
Ба, кед на тот керпец
зас ніт откаль взяти.

Але тоты горы
Прото сут нам милы,
Бо в них рускы люды
Все от віков жили.

Ту нас австриякы
В кайданы ковали
И в Талергоф, в тюрму
Нас всіх отсылали.

Штобы выгубити
То лемковске племя,
Стерти с лица землі
Русь и руске имя.

Им брата Каины
Наши помагали
И ложны доносы
На рускых писали.

Но Бог милостивый
Позволил вернути,
Руску Лемковщину
Ище оглянути.

Не встрашат нас кайданы,
Тюрмы и неволя,
Мы рускыма будеме,
Бо в нас сильна воля!

Тепер лемкы в згоді жийме!
бо мы рускы люды,
И най руске имя всегда
Нам дороге буде!

Г а в р и л.

Крыница, дня 17/9, 1934.

Рух по наших селах.

Смерековец пов. горлицкого. В часі прошлых вакаций оживил ся кус культурный рух в нашей читальні. Наша молодеж, котра поняла, што світ цінит лем человека просвіченого и што лем просвічены люды могут сотворити ліпши житьовы условия, старат ся ходити регулярно до читальні и охотно горне ся до науки и просвіты. Труд тот нашей молодежи дає добры результаты, бо читальня має вышколений мішанный хор, котрый мали случайность чути всі на Талергофском С'їзді в Сквиртном (хористов треба заохотити, штобы выступали в народных лемковских строях, прим. редакции) и має свой театральный кружок, котрый дає часто представления.

Дня 9. вересня т. р. устроил тот кружок вечеринку, зложеноу с короткой комедии и співу, котра выпала несподівано добре. Помимо доща салья была переполнена и гости были так довольны, же домагали ся повтореня той вечеринкы.

Читальня им. М. Качковского в Смерековци розвивала бы ся ище ліпше, если бы в ей работі не перешкаждали ворогы. Одним с таких ест поважанный через ціле село о. парох Шевчук, котрый хце выробити собі вліяє серед людей из проповідальницы церковной. Он, вмісто Божого слова, громит в церкви читальню и ей членов и страшит людей тым, што в читальні ширит ся православє. То однак не перешкаджат о. пароху принимати у себе и гостити теольога православного, котрый, яко будучий православный священник буде напевно ширити православє. Того православя однак о. Шевчук не боит ся, лем нашого, читального, бо тот теольег ест украинец. Отже не о католицку віру ходит о Шевчукови, лем о украинизацию наших рускых земель. Православє украинске добре, лем сохрани Господи руске, бо то смертельный гріх и для такого уж ніт спасеня ани ту на землі, ани на другом світі.

Читальня урядила забаву с буфетом, штобы оттягнути людей от жидов. Не сподобало ся и тото „вітцю“ Шевчукови и он начал кричати на проповіди, што люды попили ся и што читальня доходит до грошей нечистыма средствами. То нам селянам не можна выпити порційкы вина, або шклянкы пива, а оттігана людей от корчмы, в котрой пют горілку, то річ нечиста. А откаль то вы знате, же люды попили ся, коли на забаві сте не были? Ци то може донесла вам жидовка, до котрой ваша родина на Великденє с кошиками на гостину ходит?!


Слухайте егомосць! На казанях не рушайте нашей читальні ани ей членов, казаня перезначте на тото на што их перезначила Св. Церков, отже на поясняє Святого Писма! Втотчас люды найдут в церкви потіху в своих вгрызотах и успокоєне, бо тепер на правду лем в церкви грішат.

А мы брата и сестры трудме ся дальше в нашей читальні, нехай она ровяснят наши головы и побідит темноту!

Щирый приятель егомостя М. Коваль.

Поміщайте ологошеня в газеті «Л е м к о».

Кто хце прислужитися нашей газеті, нехай зберат оголошеня с міст и сел повітов Леско, Сянок, Красно, Ясно, Горлицы и Новый Санч.



Штрайк работников горных в Англии.

Переговоры между властителями копалень и горняками работниками окончились неудачно, в виду чего работники в числі 140 тысяч маюгт распочати штрайк дня 1. жолтня.

Страты Японии, нанесены через тайфун.

Японске министерство внутренних діл оголосило страты, нанесены населению через тайфун. Убитых ест 2 064 людей, раненых 13.335 а загинуло 258. Вода змыла совсім 868 домов, завалило ся 22.057 домов, а ушкодженых домов ест 18.391. Вода заляла 169.875 домов, змишила 210 школ и ушкодила 331 мостов. В дакотрых місцевостях грозит голод.

Пекло под земельом.

Катастрофа в копальнях угля в Англии оказалась в своих послідетвах значно страшнійша, як то початково подавала дирекция копальні. Оказуе ся, што под земельом в часі выбуху пожара в копальні остало 261 работников. С тых выдобыто першого дня 10 убитых. При ратованю засыпанных трох работников стратило жите, в виду чого загальне число страт выносит 273 людей: Ніт уж найменьшой надежды уратования засыпанных, бо тоты несчастники находят ся уж перешло 60 годин под земельом, окружены со вшиткых сторон пекельным огнем спорошкованого угля. От того часу огонь росширил ся значно и ест так сильный, же стіны угля сут аж червены.

Страшна катастрофа в Новом Санчі.

На так званом сліпом торі желізно-дорожной станции в Новом Санчі уставлено килькадесят товаревых вагонов, в котрых живут позбавлены даху над головом родины потерпівших от наводнения. В отдали килькасот метров от сліпого тора находит ся сточня, откаль переточают вагоны на ріжны торы.

Незнати с якой причины дня 23 вересня т. р. вагоны со стечні оторвали ся и с величезном силой ударили на вагоны, в котрых жили люди. Послідства были страшны. Два вагоны вышмарило за вал, а оден совсім разбило. С под вагонов начали розлягати ся крики и йойки раненых.

Кильканадцетеро люда придусили разбиты вагоны; дуже людей попарила кипяча вода, находяча ся на кухнях в вагонах.

Раненых перевезено до шпиталя в Новом Санчі.

Побіда польских бальонов о кубок „Гордон Беннета“.

Дня 21. вересня вылетіло с Варшавы 18 бальонов в повітре, котры взяли участь в заводах о нагереду—кубок им. Гордон Беннета. Бальоны тоты належат до ріжных европейских держав.

В тых заводах припали три перши місца польским бальонам, котры змогли удержати ся найдолше в повітря и перелетіти найбільше пространство.

Побіда тоты высунула Польшу на перше місце в Европі в области авиации. По точным данным перше місце припало бальонову „Косцюшко“, котрый перелетіл 1300 км. и удержал ся в повітря 44 години. Бальон „Варшава“ перелетіл 1200 км. и удержал ся в повітря 36 годин, а бальон „Польония“ перелетіл 1175 км. и оставал в повітря понад 23 години.

35 люда в поломени спорошкованого угля.

Дня 22. вересня т. р. при угльовом шибі „Кляра“ на Шлеску мал місце страшный случай. Коло того шибя зберали безработны отпадкы угля. Нагло на пространстві 10 м. спорошкованый уголь розсыпанный по землі запалил ся и поломень обняла в очиміню 35 людей, котры попарили ся страшно. Жертвы случая, на котрых запалила ся одежда, разбігли ся серед крику и йойку на вшиткы страны, стараючи ся загасити природіву. Кильканадцетох шмарило ся до болота, ратуючи ся таким способом перед смертью. Пожар повстал сам от себе, то спорошкованый уголь запалил ся под великим тисненем повітря. Попареных отвезено до шпиталя.

Ест медже нима 10 небезпечно-попареных, 11 тяжко раненых и 14, котрых раны сут легчи.

Якы работы має газда в жолтні.

В жолтні треба кончити засівы озимин. Копати картофлі, але аж втотчас, як они пристають. За ескоре копане приносит страту, бо картофлі в осени подрастают ище, а притом непристали пеуют ся и гниют. Пристали картофлі познае ся по том, же натиная ест суха, а лупа тверда, пристаюча, котра под натиском пальца не зсуват ся. Копати в часі сухом. Выбрати пашны буракы, карпелі, пашну морков и инши. Вывозити навоз на поклады под бураны, картофлі и другы окоповы. Слабы озимины засилати салітром або гнояницем и перекопати мотыком. Луку навозити компостом (навозом зробленным в ямах со согнилых отпадков кухонных и господарских).

При живом инвентарі

переходити пестепенно с зеленой пашы на суху, зимову, не давати дуже бурачного листа. Свині и домашни птахы опасати, осенни поросята отлучати; заосмотрювати ся в сытны пашы на зиму. Худобу перезначену на продай, выпасати.

В саду

збрати овочи. Зберане овочей ест важне для владілца сада, бо от того ест зависиме дальше приставање зимовых овочей и их ціна. Зимовы овочи маюгт два периоды приставања. Перший период тот, в котром овочи надают ся до зрываня, а другий, коли они уж совсім пристали и добры до їдла. До того другого периода приставања овочи доходят

в складах. Штобы они однак не гнили и не стратили смаку, треба уважати на час зрываня. Зрывати треба овочи втотчас, коли хвостик легко отрыват ся от галузкы, коли зернятка грушок сут черны, а яблук темнобуры, при чом треба памятати о том, што овочи позозимушни треба зрывати с дерева як найпознійше, нерав аж при перших приморозках. Овочи за скоро собраны не даюгт переховати ся долго, не маюгт доброго смаку и морщат ся. За такы овочи достает ся низшу ціну. Овочи перезначены на зиму треба збрати руками в погодный день до кошиков, выстеленых сухым мохом, штобы ся не обили.

По отпаденю листя треба приступити до обрізаня сухого галузья и пересвітленя корон. В той ціли вырізуеме галузи нездоровы, обламаны, отераючи ся о себе и переходячи на крест.

При конці місяца желтня належит приступити до садженя молодых деревец и закладања новых садов. Сад треба закладати на найліпшой землі. Місце выбрати затишне, бо вітры шкюдят садам. Деревца куповати лем найліпши в певных фирмах. Деревце мусит мати численны тонкы корені, пнячок простый, тонкый и пятираменну, формну корону. Не щадити гроша на ладне деревце, бо оно добре росте, ест отпорне на мороз и посуху, розвиват ся сильно, дае моц овочей и не боит ся вітров. Стары дерева треба оскребтати с коры, очистити пнякы, переорати под нима землю и добре знавозити перегнилым гноєм.

Ярины

даюгт также в осени дуже работы. На жолтень остали ище морков и петрушка. Морков найліпше зимует ся задоволана в узких, неглубоких ярках, на землях сухых, неподмокаючих. Петрушку, если то ест копотка отміна, зимовати так само як морков, але в часі сильных морозов прикрити листем або соломом. Обі тоты ярины зимуют слабо и кто не має практыкы в перехованю их через зиму, а має их великы количества, то ліпше зробит, если продаст их в осени, бо тоты ярины легко гниют. Отміна долга петрушки зимует добре в грунті, присыпана в часі морозов легко листем, або соломом.

Маючи удобрену землю по картофлях и капусті, можна в послідних днях жолтна засіяти насіне моркви и петрушки. Дае такы сів великы материяльны користи, бо вырастают они о 2 неділі скорше от сіяных на яр. Сів осенний мусит быти густійший, як ярный и вымагат легкой накрывы листя, або соломы в часі морозов. Выраховати треба однак так штобы зернятка не склчили ся перед зимом, (Насіне моркви пукат по 14 днях, а петрушки по 15—20 дней). Не треба отже понагляти ся с осенним сівом, особенно того року, коли погода робит с нами ріжны фіглі.

Ище килька слов о збераню пашных ростин, як карпелі и инши. Карпелі (бруков) перетримуюгт добре зимно и належит их держати в полю аж до приморозков. С выдобыванем с землі не треба спішити ся, а зимовати конечно в передувных місцах, бо без вентиляции тухнут и гниют.

ПОМІЩАЙТЕ
ОГЛОШЕННЯ
В ГАЗЕТІ „ЛЕМКО“.

Поминальне богослуженє за души бл. п. мучеников Сандовичей.

Дня 30. вересня т. р. отправлено в Брунарах Выжних пов. горлицкого панихиду за души бл. п. О. Декама Петра Сандовича и Его сына Антония погыбших в часі світової войны мученическою смертю и поставлено на цментері скромный памятник в виді креста.

Погода была красна и зышло ся много людей со Смерковца, Сквиртного, Устя Руского, Ганчовы Снітницы, Білцаревы и других доокрестных сел. Пришел также О. Михаил Соболевский с Устя Руского, талбѣргофец, со своим хором и хоры с Ганчовы и Смерковца. По отелуженю Службы Божей и парастаса через О. Соболевского и місцевого пареха рушил крестный ход на цментар, несучи крест-памятник. Там по отслуженю панихиды в коротких и трогательных словах О. Соболевский и г-н профессор Максимович из Горлиц представили цілу Гольгофту руского народа в часі світової войны, а потом хор с Ганчовы отспівал: «Со святыми упокой»...

По опущеню цментаря присутны зышли ся в дому г-на Пецуха и там ухвелили одноголосно собрати фонд на перенесенє мощей мучеников Сандовичей с Нового Санча до Брунар. Выбрано Комитет, в котрый вошли г. Ник. Юрковский управитель школы в Сквиртном, яко председател, г. Максимович профессор гимн. в Горляцах, яко секретар, г. Пецух Спиридон, г. Василь Трехановский, г. Петро Кузмяк г. Дмитро Войтевич из Брунар, Выжних, г. Роман Шпыхто, г. Павел Одомиром из Брунар Нижних, г. Атанасий Гамбаль из Яшковы и г. Никита Корбич из Снітницы, яко члены, котрый має заняты ся организоваєм місцевых комитетов по вшиткых селах Лемковщины и збором грошей на перенесенє мощей и выставленє памятника в Брунарах.

Згынуло в часі світової войны моц нашего народа, украсили ся придорожны вербы невинными жертвами, повішенима через лютых катов на доносы Кзинов—братов, терпід и мучил ся народ по вязницах ц'лой Австрии и великий процент тых мучеников не вернул уж до своих родин, бо не перетримал нанесеных Ему мук. Свідчат о том талбѣргофскы сосны, под котрыма спят вічным сном понад два тысячи найліпших сынов нашей святой Руси. Одним из перших таких мучеников, отдавших свою жизнь за руске имя и русский народ был бл. п. О. Декан Петро Сандович, парох с Брунар и его сын Антоний. Арестованы на ложны доносы Каинов, станули они оба перед военным судом в Новом Санчі, котрый операючи ся на ложном под присягом зложеном свідоцтві священников-украинцев, Смолинского и других и учителей-украинцев с Гуцеляком на переді, выдал на тых невинных засуд смерти через розстріл, котрый выполнено дня 28. вересня 1914. р. в Новом Санчі на «Гелсіні».

Уж 20 літ минуло от коли лежат там их кости в забытю, но народ не забыл их мученическою смерти, народ памятає о них и тому желеє спрозадити их мощи до Брунар, и там поставити им памятник, штобы под ним наберати сил до дальшого труда для добра Руси.

Тому то нехай не бракне никого в сборі потребных на те средств. Нехай каждый причинит ся, чим може, не треба дуже, але треба, штобы на тоту ціль дали вшиткы. Жертвы належит присылати на руки г-н. Николая Юрковского управителя школы в Сквиртном п. Усте Руске. Список жертвователей буде оглошати ся в «Лемку».



Дівчата и вдовы — то для вас!

Мушчина темзоволосый (шатый) літ 23
має охоту оженити ся и глядат товаришкы жита в віку до 21 літ с приданым около 400 долларов, або мавтком отповідной вартости.

Оферты с фотографием прому присылати под адресом редакции „Лемка“

Крыница под „Счеслива молодеж“.

Найліпше и найдешевше

може кождый фурман заосмотрити ся в потребный для себе товар як овес, сіно, січку смары, подковы клинці в своей русской „Фурманской Кооперативі“, котра находит ся в Крыници Здрою в домі г. Назара Громосяка коло різні.

Кто хоче штобы

в календарі „Лемка“ на 1935 р.

было поміщено дашто о его селі, нехай скоро присылат материал а также фотографии. Редакция просит присылати также лемковскы пісні, описи звичаев, обрядов, оповіданя и жарты.

ПОМИЩАЙТЕ ОГЛОШЕНЯ В ГАЗЕТИ „ЛЕМКО“.



Выбор Мис-Лемкыни и найкрасшого Лемка!

В субботу, дня 6. жолтня 1934. о год. 7. вечеро, устроює Лемко-Союз в Поворознику в домі Чит. им. М. Качк. вселемковску, велику забаву с танцами и розличными мильма несподіванками, а также выбор мис-Лемкыни и найкрасшого Лемка на 1934 р. **ВЫБРАНА ПАРА ДОСТАНЕ КОРОНЫ И ЛЕНТЫ С НАПИСАМИ.**

Обязуют народны строи для дівчат и для хлопцов в міру возможности.

Села и читальні присылайте своих красавиц и красавцов! Снимки выбраной пары будут россланы вшиткым газетам руск им, краєвым и американским.

Буфет заосмотреный добре! меринді не треба! Ночлегы даром але треба их замовити перше писемно в редакции „Лемка“. Желізнодорожна станция в місци.

Вход 99 гр.

Найліпши условия асекурацийны

дає

**Асек. Товариство
ВИТА-КРАКОВСКЕ
во Львові.**



Оно спомогат также наши товариства.

Информации уділат редакция „Лемка“.